

INUIT ATAQATIGIIT INATSISARTUNI



UKA2033/26

Ulloq: 28. September 2023

Oqaaseqartoq: Mariane Paviasen

**Siunnersuut uunga: Utoqqalinersiaqarneq pillugu Inatsisartut
inatsisaata aamma siusinaartumik pensionisiat pillugit Inatsisartut
inatsisaata allangortinneqarneri pillugit Inatsisartut inatsisaat
(Utoqqalinersialinnut siusinaartumillu pensionisialinnut pensioninik
naatsorsuineri pilersuisussaaqatigiinnerup atorunnaarsinneqarnera)
(Isumaginninnermut, Suliffeqarnermut Nunamullu Namminermut
Naalakkersuisoq)**

Naalakkersuisut siunnersuutaannut utoqqalinersiaqartut siusinaartumillu
utoqqalinersiallit aappaqarnertik apeqqutaatikkunnaarlugu
utoqqalinersitinneqartalernissaannut tunngasumi Inuit Ataqatigiit sinnerlugit
ima oqaaseqarfigissavarput.

Upernaaq inatsisartuni ataatsimiinitsinni utoqqalinersiaqarnermi
aappariinnerup apeqqutaatinneqarluni utoqqalinersititsisarnerup
allangortinneqarnissaannut siunnersuuteqartut marluuvugut.

Inuit Ataqatigiinni qineqqusaarutigisimavarput utoqqartatta ullumikkorniit
pitsaanerumik atugaqartinneqalernissaat, tamannalu pimoorullugu
suliaraarput, malinnaasut eqqaamasimassavaat ukiaanerani 2022-mi
utoqqarnut inatsimmik ataatsimik pilersitsinissamik siunnersuumik qaqitsinera
taanna aamma iluatsikkiartortoq, ilisimatinneqarpugut Naalakkersuisut
utoqqarnut inatsimmik suliaqarlutik ingerlanertik oqariartuutigisareermassuk.

Aappaqqarneq aappaqannginnerluunniit apeqqutaatillugu
utoqqalinersiaqartarneq inuit naleqassussaannut assigiinngisitsinerusoq

INUIT ATAQATIGIIT INATSISARTUNI



isumaqarpunga, taamaamat nuannaarutigaa Naalakkersuisut siunnersuutigisimasatsinnut matumuunakkut siunnersuumik qaqitsipallassinnaamata, kisiannili paatsuungassutigaarput inatsisartut inatsisaat nr. 20, 23 november 2015-imeersup allangortinneqarnissaani paragraf 5 imm. 2-p peerneqarneratigut inatsip sinnera nalimmassarneqarnerusinnaanera suliarineqarsimagunangimmat.

Naalakkersuisummi siunnersuutaani utoqqalinersiaqartinneqartut siusinaarlutillu sulisinnaajunaarnersiuteqartut aappaqarnerat aappaqannginnerallu inatsimmi pisartagaritinneqartinniarnallu suli assigiinngitsumik ingerlassasoq siunnersuutigineqarmat, Naalakkersuisut tunngavilersuutaani ima allassimasoqarpoq:

“ Taamaattorli utoqqalinersialinnut kisermaanut utoqqalinersianut tapit amerlanerpaaffiisa ukiumut 83.309 kr-it (2023-mi qaffasissuseq) aamma utoqqalinersialinnut aappalinnut utoqqalinersianut tapit amerlanerpaaffiisa ukiumut 46.307 kr-it (2023-mi qaffasissuseq) akornanni nikingassut siunnersuummi attatiinnarneqassaaq. Taamaattumik utoqqalinersiallit kisermaat aamma utoqqalinersiallit aappallit utoqqalinersianut tapiisa annertussusaat nikingassuteqaannassaaq.”

Utoqqalinersiaqarneq pillugu Inatsisartut inatsisaat nr. 20, 23 november 2015-imeersup §10 allangortinniarneqarsimanngitsoq paasivarput.

Utoqqalinersiat tunngaviusumik tunniunneqartartut assigiissarneqarsimanerat nuannerpoq, tassami utoqqalinersialinnut tapit tunniunneqartartoq allangortinneqalinngilaq, tassani aappaqarneq aappaqannginnerluunniit suli apeqqutaatillugu utoqqalinersianik tunniusisoqartarnissaa naalakkersuisunit siunnersuutigineqarpoq, aallaqqaammut siunnersuuteqartut saqqummiussap misissornerani taamaalilluni paatsuunganarsivoq, misisussassaqqillunilu tassami suli utoqqarnut aningaasarsitsisarnermi Naalakkersuisut

INUIT ATAQATIGIIT INATSISARTUNI



siunnersuutaat malissagaanni aappaqarneq aappaqannginnerluunniit
apeqqutaatinneqartoq tunngavilersuutimini allassimagaat
maluginiannngitsuungilarput.

Naalakkersuisut siunnersuutaat aappaqarneq apeqqutaatinnagu utoqqalinersiat
siunnersuutigisimasatsittuut pitsaasumilli ilallugu tassa siusinaarlutik
utoqqalinersiaqartut utoqqalinersitinneqartalertusangornerat tunngavimmik
tunniunneqartartup assigiilertussaanera ukiorpassuarni anguniagaasimasoq
nuannaarutigaarput angujartuinnaratsigu, tapinullu tunngatillugu
misissugassaasoq maluginiarparput.

Angusaqalerluta misigaagut kisianni qulaajagassaqaarluta takusinnaavarput
taamaammat naalakkersuisut siunnersuutiminni taamak oqaaseqaarluta
anigaasaqarnermut ataatsimiititaliamut ingerlateqqipparput kissaatigalugulu
Ilaqutariinnermut peqqissutsimullu ataatsimiititaliaq suleqatigalugu utoqqaat
aappaqarnertik aappaqannginnertilluunniit apeqqutaatinnagu aningaasanik
pisartagaqalersinneqarnissaat naalakkersuisut siunnersuuminni
tunngavilersuutaani aappariinneq kisimiinnerluunniit suli apeqqutaasasoq
allassimammat sukumiisumik ataatsimiititaliamit qanorpiaq
sunniuteqassanersoq, utoqqaat aappariit kisermaatulli
tapisiaqalersinneqassagunik kisitsisitigut takussusiorfigineqassasoq
assigiilluinnalersitsiniarnerlu anguniaraanni qanoq iliorsinnaasoqarnersoq
misissoqquavut.

Qujanaq.